

半巖廬遺集

道光三十年三月位西先生由先大父文恭公疏薦

文宗顯皇帝特旨召對駿駿將大用矣時先生爲軍機
章京陝甘總督某以枉殺番案被逮 詔軍機大臣與

刑部會鞠丈與諸章京及諸司同任其事有陰爲某地
者多舉細故詰問某抗辨自若先生至出懷中間目詰
之某瞠不能答同列睥眄不知所爲由是側目者多矣
粵事起遣重臣視師先生爲十不可之議請上之格不
行師果無功自是不見容至河工旋被劾去杭城陷死
之先生死事顛末國史自有傳其軼事恐世不具知遺

詩刻成因書其末吳縣潘祖蔭識

題勉甫所藏邵位西員外詩冊

孫衣言

落落交朋恨昔年驚看珠玉富新篇
郎官自隱百僚底詩筆須論四代前
濟世才能偏得謗猶人狀貌要營傳
莫輕覆瓿深緘襲我亦桓譚望後賢

奉題位西先生遺詩

杜文瀾

位西先生人中豪意氣直欲干雲霄
珥筆隨扈聲名高骨鯁必吐不可撓
翻然歸隱脫塵囂閉門著書身逍遙
城頭夜半鳴鴟鴞天地慘黷人鬼號
先生罵賊神不搖挺身直銜溫序刀
等身著作一炬焦幸遺片羽歸鳳毛

裝以吳綾徵題標媿我日事案牘勞久矣筆硯焚君苗
盟手三復聊獻嘲屋梁月落風蕭蕭

天徒凋大雅才遽厄妖氛佩異蘭遭忌岷炎玉竟焚虛
陳薦賢表半佚禮堂文交誼黃墟感

謂湘鄉
相國

吳山有斷

雲

威鳳逝寥廓飄零賸墨香眼明檢書帙手澤愴滄桑亮
節有誰並斯人終未亡平津今安在輕重試衡量

戊戌秋七月侯官林啟敬題

直言敢諫聞天下先輩衣冠及見之已向湖山身抗節

猶傳京洛手鈔詩裘餘片羽人多惜琴奏孤絃世少知
更喜文孫能述祖搜鐫遺稿續韓碑

戊申二月上浣陸元鼎敬題

芳馨盈帙見遺詩風義平生寄所思故國山河春有夢
暮年戎馬鬢成絲封章忼慨驚邊帥文字叢殘證舊知
更向鐙前懷勁草屋梁落月立多時

戊申初夏貴陽陳夔龍題於抱冰堂西軒

客武昌獲觀位西先生遺詩敬題三絕 楊懿年
半巖高詠感頽波孤夜挑鐙一再哦石爛海枯天不管

吟箋數疊自江河

倦眼看山日已曛批鱗折角獨憐君于今邊海驚風鶴
可有郎曹袖彈文

江臯草綠憶王孫手澤畱題觸淚痕我亦有親蒙國
難蕭條誰與慰詩魂

半巖廬遺詩目錄

五言古詩

楊性農孫琴西入翰林各以詩賀

中秋夜有懷言翁

碧雲寺

臥佛寺

前湖晚眺

滌生擢學士芝房有詩道其進官之速而勉以鄉
先輩風義其言甚美因和此篇贈滌生並呈芝

房

集龍樹寺壽伯言六十

補

和宗滌甫正氣詩卽以天地有正氣爲韻

補

效黃山谷八音歌

補

效建除體

補

蝟

補

七言古詩

陳恪勤公手植槐歌

陳小鐵貳尹受硯圖

送王子懷省親還歛

題邊袖石詩本

彭餓夫墓

贈前制府周敬修先生

過黃子壽適瞭書畫滿壁賦呈賢尊考功

孫芝房簪簋谷圖

偕伯言過廠肆買書有作

送戴少司馬南歸二首

吳門郭季虎以十月十七日壽放翁於今四年矣

朗亭徵詩

從朗亭乞冬筍索賦

送翰臣視學湖北並題乍浦攀轅圖

四月三日招同人觀寓齋牡丹分得波字

用訪滌生韻贈醕士

寄吳仲雲廉訪

詩廊爲朗亭侍講賦

題吳仲雲先生輯詩圖

題林若衣浮水數鴻圖

劉寬夫侍御藏沈啟南畫像絕類伯言戲簡

補

十二月十九日劉寬夫侍御招集雪浪齋懸東坡

簪勝笠屐二妙寫真諸圖同諸君作

補

贈伯言南歸

補

效二十八舍歌

補

題慈谿赤山族祖

楨

侍遊普陀圖

補

五言律詩

擬進

宣宗成皇帝挽詩四章

寓齋

徐氏女南歸

偶憶五首

寄方植之先生

寄合肥徐懿甫

至日入直

儀徵相公挽詞

柬滌生侍郎

寄姚石甫先生三十韻

戊申三月隨扈恭紀四十韻

題七峰別墅十韻

補

蚶二十韻

補

勃薺

補

胡桃

補

七言律詩

仙跡

草野

次韻吳清如留別二首

吳補之學士與清如同日乞假仍次前韻志別

次韻芝房見柬

次韻芝房偕性農見訪

喜聞少鶴病已

翰臣書來道粵西土賊甚劇

答董思陶

答戴存莊

潘季玉養閒堂

孫琴西海客受經圖

和文信國公琴

無題三十首

五言絕句

香山五絕句

七言絕句

題汪楓人遺墨

五言古詩

楊性農孫琴西入翰林各以詩賀

神魚啖鉤牯不能赴瀾漫鳳羣見驚驚寶所擢琅玕君
從田間來喜彈頭上冠文林要識職諫紙且旁看羣公
何天衢奮欲殿檻攀朋來一陽復邪許五雲端麻冕百
川納賢路亨無艱君適應時須忤忤激忠肝獻曝太早
計行不貴苟難藏身善弓矢養氣銳鎡干一語尤服君
慎勿家於官刺刺顧婢子茅艾化荃蘭春虛采蘋宮載
途涕洟瀾涼秋急歸窆衣錦誰與歡東閣觀奇士北轅

休盤桓還來共臣朔索米向長安

文思繼明照策士天網頓招要我輩人談詠共鼃飯魯
徐號文雄戰藝力敵萬溫生老魁壘餘子悉騰健如何
但雙鳥舉翮皇路獻不能盡豪英一二足程勸楊君出
荆樸流血矜久困君固愜衆期教胄名早建嗚呼島王
子侍立花繡褱傳詩滿東瀛搖毫珠璣噴有弟方乘輶
桂海滋蘭畹金昆復館職如珏照塵坌嗟時不說學紫
清跡頗恩揆摛振凡庸趨走守古鈍上唯君子使下無
朋友怨勉率樹英聲勿爲麒麟楨

中秋夜有懷言翁

常月月有圓舉俗愛此日兒童未夕譁清光盼東溘家
家羅酒飯合坐同親暱羣喧默懷思所思古之逸相從
過陋巷十載會眞率茵馮具宜稱可意書滿室論文向
鐙窗一笑萬慮失經年別未久秋戶又鳴蟀江都著書
地側想富文筆佳節誰與歡步月爲誰出曩歲留詩約
游蹤果合一料得桃花菴不眠對吳質

碧雲寺

連峰浩奔駛登高見如環佛寺初不見窈窕藏隈灣入

門忽金碧百尺飛孱顏穹梁跨陰壑涌殿開中巒螺旋
上塏頂俯視心骨寒吾徒樂一眺始作財力殫想當伐
石時萬杵殷千山淨虛屈雄鷲化人豈求安崇基有阨
毀成虧諒不難惟有太古水盤涸出人閒

臥佛寺

近山泉石佳臥佛益峻清古佛倦對客高枕流水聲方
池窈深黑墜瀑鏘然鳴草樹掩壁色繞林虛風生宴坐
入水氣下有飛泉行山空聞遠樵微響激雷輞長廊穿
洞達午貫何縱橫庭前娑羅樹柯葉交清瑩上無凡禽

樓下無惡草萌徑欲餌其實使我煩疴平

前湖晚眺

落日山後光斷霞紅在底湖開天宇空雲凝風固止何
來萬蜻蜓蹙蹙交戲水下有魚吹泡圓漚散復起隄東
樹色冥天光漸西委負手憺忘歸游神高空裏

滌生擢學士芝房有詩道其進官之速而勉以鄉
先輩風義其言甚美因和此篇贈滌生並呈芝
房

吾交天下士楚材特瑰秀畜水於地中洞庭最閎富湘

山巵秦赭憤發氣蒸餾金丹數夏賦九牧遜多又入座
意森沈萬象欲籠覆行身類兀岸吐詞必龐厚莫不抱
古編額額日討究觀其所執持資育莫果鬪豈繫天所
開今此賢古舊曾侯才既老負重勝耒厖飛飛赤鳳皇
天網適游殼幾日呼其曹丹闕鞏神構鼎膏舉剛局井
汲資堅甃高明來走趨轂暢輻爭湊甘言善熏移妙質
恐遷貿孫子陳古義丁嚶友聲奏臚說鄉先生誠勉願
塞副丈夫自植立本在畏屋漏事功勿意行著述要心
句流從固須矯亢驚慎毋狃時艱撥雲雷古處返鶉鷄

庶見命世英衰圯一扶掾

集龍樹寺壽伯言六十

天葩爛蘆敷撥落見真靜獨追千載心浩蕩文章境攬
之不盈手所得清且炯孤鸞一引吭俛噤萬鼃黽曰維
耆壽俊吾黨日趨請親見揚子雲祿位但卑冷虛懷入
天倪凡滓力祛屏過從敢自遠懿戒且相警彊食終無
何斯事賴持秉

葦坡搖春綠環闔抱虛靜迴車釣積水翛然出人境天
容紆淡白遠目拓雙炯翻翻櫺前燕閣閣草閒黽言多

素心人至不待要請午陰龍樹圓落日水風冷看山指
樓桃潑翠入門屏茲遊暫離俗清言況卓警各有金玉
章吾筆覲先秉

和宗滌甫正氣詩卽以天地有正氣爲韻

富貴如浮雲忠孝天植堅舍生取忠孝譬撥雲見天塵
沙倏變滅白日萬古懸雞鳴風雨晦斷此柔道牽

田單附王蠋太史有深意轉恃一蠋亡立主夏齊地厥
後歐陽筆區死節死事一死賢於生善死尤不易

噫惟勝朝末舉古異科曰貞良日斬雉義烈滋奮有成

仁固無憾滅頂亦不咎孰倡砥風節而衆恥偷苟
君繫水木感重以桑梓敬桓桓葛將軍結纓斃得正異
代同堂席先後互輝映眎此閣中人激發未昏性
天下事可圖在直遂不畏千金與猛虎一鼓作之氣騷
情耿介慕易道陽剛貴殲波及時挽士其可不毅

效黃山谷八音歌

金猋吹百草白髮來如期石轉心不轉耿耿抱獨奇絲
綸清切地言行敢俱危竹帛百年後嗟我莫見之匏繫
而不食聖人病無施土風戀鄉井舄今祇益悲革裏向

沙場壯懷空爾爲木生才不才一付大專司

效建除體

建德亦有國無何亦有鄉除去心中憂所賴有杜康滿
堂怵迫徒淵魚訾不祥太平意何日錐刀息攘攘定緣
本心蝕掩蔽日月光執鼠本狸德今茲同跳踉破裂冠
與冕爲謀俾不臧危如燕巢幕嘻樂未渠央成虎多三
人訛言亦孔將收身去何嚮秉翟色陽陽開懷飲狂藥
草樹淒已霜閉置勿復陳天高聽難詳

蝟

追涼湖壩樹意行不覺遠散月地清陰有物壓在阪大
非豪猪獮小異蛄斯蛭厥名彙毛刺腹似飲河鼯天厨
遺禁嚮蠢蠢蹠緣苑巨軀鼓胗肚弱足步蹠蹇有或跼
其膚圓轉自閑梱剛毛拒持拏縛取待滕緄豎顙何怒
張挫芒就束捆捉歸用扱衽閉置聊下楫百蟲美價利
笑爾形渾沌屈前儕免跽內息類鼯偃居常穴土疏出
或蔽草蓐蠕動向閭陬往往撲觸聞徐趨劣免顛庠伏
稍得穩畏人仍似鼠警響輒踰踈嫌中病叟咳虛室入
聽宛深秋實包栗俛拾看欲混蒼然背毛磔如衆矢集

盾持滿悉外鄉攢鍼銳棘苑有時翻仰臥腹肉赤婉婉
虎見驟吞噬入咽忽偏反還從虎腸內以虎作糲飯小
數敗山王用意一何狠獨見辱於鵲誘彼適自損迅飛
下啄肉轉身嗟已晚西家棗垂熟上樹瓜其本搖落滿
階庭旋下以身輓累累著體閒槃跚負之返竊瓜尤便
巧中黠貌特困俗云爾有神禮敬常繾綣謂尸貨貝權
瞥見默祈懇吾於爾無求飢畜付庭壺勿學癩墓精覆
瓶倏遷遯

七言古詩

陳恪勤公手植槐歌

湘江老蛟繫不住脫鬣擎空作煙霧蒼然欲落不知處
去作湘潭館中樹邦失司直餘百年手栽喬木今參天
當年樾蔭江南徧讒舌高張赤如電龍潭治步一日成
蛭蟻俄從御牀見偶題漫與虎邱詩心逐鷗波盟一片
賴得回天有相公白衣再入觀文殿豹直歸來客舍清
荒灣野色連東城壯心欲盡老編校矻矻蠹簡嗟何成
摘來天上虛星精試擲丸泥兔目青眼看翠蓋覆清坐

涼若牽船向洞庭種桃可口棘傷手此木成陰蔭千畝
留得清風被後人河上旌旗一回首辛苦拏焚竟不歸
泣灑隄孺萬絲柳

陳小鐵貳尹受硯圖

相國之硯太僕藏中丞手傳犀角郎人弓人得意冰釋
西華葛帔秋風涼公私刼刼憂桂玉石田何從覩稻梁
遣作衙官博斗食鸞棲枳棘摧文章昔對君苗欲焚硯
羈齡速藻驚老蒼浮邱閣中餞君別下筆磊磊騰珠光
南驅北走瞬一作日月長拋墨筆親風霜新安程生江

漫

夏黃或躋學省升一作昇玉堂君與齊名獨堙尼不復射

策干名場喬木灰飛萬金散何恤區區拳石亡男兒七

尺志自強塵中手板莫黯傷起家曹掾八州督龍蛇變

化嗟何常神駒赤汗終千里

一作讀書種德君家事

太僕中丞流

澤長

送王子懷省親還歙

黃山拔地高切漢新安萬家矗天半并州城頭望白雲
有客思親淚如霰老親頭白愛山居飯有秔稻羹雞魚
春雷筍菽味絕殊比鄰富厚還勤渠土風素樸樂有餘

顏齡官復命舟車雖不勅還日倚閭長安冠蓋如雲鬧
金距狸膏鬪雞貌高門懸薄無不到漏盡鐘鳴誰復覺
希聞疏廣出都門那識陽城勸忠孝君行掉頭不暫留
俶裝明發逾蘆溝一江春水下歸舟幾日還家滌廁牖
看婦織作兒吟謳暮歸侍親晨出游黃山雲海足底浮
人生快意有如此何用功封萬戶侯

題邊袖石詩本

寒鐙坐窗把卷疑疑君直作古人詩白雲在天月在手
超遙千里龍駒馳十年客旅燕南垂醉墨灑筆鴻淋漓

憂時涕淚飲入腹茫茫春色登樓悲只今身到蓬山上
猶似飢驅洛水時神仙中人不易爲玉山無禾鳳長飢
燕頤終須飛食肉莫羨紛紛昨暮兒

彭餓夫墓

人生百年甘蔗渣鐘鼓饌玉風中花條侯主父要同盡
首陽清風生蕨芽暫依故人共脫粟伯夷所樹天所祿
仁者之粟不可常我獨何爲害口腹嘯臺激嘯高雲天
神游清都飽紫煙行人空挾一車飯下馬孤墳二百年

贈前制府周敬修先生

堂下磔人如磔鼠潁川大姓栗在股威名萬里邛都鷹
拱手對賓色响响盡尸喋惡作屠伯不侮孤惇稱衆父
令淵徙鱷江渡虎墨吏望風自引去只今行年七十六
白髯飄蕭瞳正綠召來金殿伏青蒲愛國有懷傾不足
上書慷慨策平邊一心推服林公賢天其福我厭此虜
不見瑞夢在野雷誅祆嗚呼安得公及林公守圻甸方
州得人士選練折衝六合有精神坐困鱷鯢可無戰

過黃子壽適瞭書畫滿壁賦呈賢尊考功

古人之心不可尋颯然秋風一室深還留古人精爽在

鸞飄鳳泊紛來臨君家丈人愛書畫料簡不使蟲埃侵
中庭暴畏風日損懸之素壁高堂陰海王村中走僕僕
君從而後游書林各投所好望門入此時父子忽異心
米老蒐奇有古癖王充入市惟書淫歸來堆疊滿篋几
論價不惜酬兼金俸錢到手便傾付清茶展對喜溢襟
君之蓄書求有自紙板不辨古與今未若丈人精品目
縑素甲乙排森森朱絲鐵石不遺恩九原喚起欣知音
夜闌直恐虹貫月四邊金薤垂琅琳臥游倘欲衆山響
中坐一鼓龍脣琴

孫芝房簪簋谷圖

君胡繫思簪簋谷君今身寄金馬門得時雷動不遑息
九華殿上重蒙恩五溪歸來納使節殺青掌錄勞朝昏
湖南接天暗篁竹萬古草綠瀟湘翻君非其時歸豈得
中谷漫指桃花源青鞋黃帽野人具白雲翠篠山凹村
君曰童時所游釣側耳清夜聞啼猿出山幾何神弗王
有如澤雉投籠樊昨者西風動衫袖夢到茅屋蒼厓根
長鑱凌虛劖仙藥短紙曲折開秋原玉堂不見郭熙畫
時復對此蘇心魂

偕伯言過廠肆買書有作

莊生貧如涸轍鱗豈有羣書供獮祭翻新不肖襲糟魄
屬書離辭何詆麗古者私家無竹帛閭塾相傳但經藝
後來著作日紛紛棗木行將塞四裔傳摹甚易得不難
翻使聰明受揜蔽當年制字煩鬼哭更欲燒書起秦帝
就中古冊不可無一二菁英擢蕪翳連鑣不厭百回看
洛陽市肆歡游詣先生庋架盈古香十萬騁騶簡精銳
此皆下駟不足貪識寶波斯偶留憩叨同雅好耽紉素
愧與市人生校計得虞重費囊底羞失每牽懷夢中嚙

先生一笑子歸休臥想陶陶結繩世

送戴少司馬南歸二首

五更淅淅鱸江雨青山入夢神先舞一身乞得一家驚
忽把衣冠掛神武妻孥童僕何足計獨繞庭階心口語
諸公自是廊廟人老子歸作湖山主山麋澤鷺野心性
強著金璫無太苦居然漫叟返邱園尙惜朝衫帶塵土
白蘋黃葉滿江風飽飯船窗聽鳴榔不惜人呼老畫師
身入畫中誰畫取滄波淼淼一扁舟臥看秋漁收晚罟
公勿自疑應自許此事今稀良近古青鯨跋浪入重溟

不視萬魚空。响响金貂玉蟬。非性分。曾不羞慚。謂天與
以同。自證死。不閒謬竊光榮。眩兒女如公。一占蜚遯。爰
愛網百重斯。以斧豐狐。文豹脫灾皮。建德遨遊。孰能阻
旁觀。尙覺腰帶適四體。乍如生翼羽。任呼狂客似知章。
免作尙書等懷祖。眼看筐篋事紛紛。滅沒飛鴻下平楚。

吳門郭季虎以十月十七日壽放翁於今四年矣

朗亭徵詩

放翁豪放人閒無。紫皇案前餐碧腴。八十五年詩萬首。
天風吹瀉滿清都。不願腰閒玉鹿盧。九環寶帶青珊瑚。

但願琬戈橫鐵馬銜枚雪夜超飛狐成都名花十萬株
眉州玻瓈春百壺醉上凌雲手招月金骨綠髓僊之臞
百年一瞬幽蘭墟麗川亭下芳華徂中原半壁皆不壽
但留團扇家家圖我欲持杯酌太虛朱樓白塔歸來乎
不見荒寒京水道青驪踏雪靖南湖

從朗亭乞冬筍索賦

吳兒食筍如食肉四時環生無絕續春雷出土夏雨肥
秋剷行鞭白如玉末若冬生味奇雋竹本虛心偏實腹
淺雪籬邊鴉嘴攜黃泥裂處貓頭伏重重苞脫錦繡嬰

觶觶尖翹繭角犢我住都門向十載時時夢到貧簷谷
瘦萌苦薤不入餐影拂窗紗僅名竹誰歟絨相致燕市
價值倍三苦難鬻不禁忍俊聊乞取冑自佳廚分旨蓄
和糝從添黃韭新瀹羹恰佐紅蚶熟喧呼釀飲七峰廬
不畏平陽近連屋手牋索我作僧詩恣嚙酣眠諾已宿
似聞飽食大官羊欲遣園蔬歸掌錄相公食筍自名齋
玉板禪參蘇玉局果令仙藥化渭川容叩公門再三瀆
但恐琅玕呪不成仍望南天齋急足不如同日解青衫
去看家山萬竿綠

送翰臣視學湖北並題乍浦攀園圖

乃翁治辦如龔黃有子文采掩班揚老鶴卑栖向東海
飛飛赤鳳升天閭狀元自有平生志年少得路未要忙
忠肝古義來答策龍洲豔說讀書堂由來廉吏不援上
仕宦如車繞羊腸不知遷除比牒盡海壖拊噢恬畊桑
誰云人心莫嚮方遮留泣灑淞西航誰云天道不遂良
漢江玉尺付文郎白雲極目三千里肅肅鵠羽思迎將
遙知書還喜且督我此暫以官爲鄉舍而就汝會有日
甌人愛我聊相羊好擢薪翹事明主方今大廈需棟梁

傳家廉白政可爾更開冰鏡懸清光

四月三日招同人觀寓齋牡丹分得波字

塵事翫脫天倪和入坐數子能高歌百枝豔發與巡看
更要彩筆同吟哦此花名品擅唐宋冶游雒水紛聯珂
鞞紅玉板鬪顏色舉國載酒來婆娑苦遭歐記詆妖異
又聞白句憂田禾詩人著筆畏縷繆故持莊論相鐫訶
天香自足冠羣豔誰謂豐碩無媚娥春喧一日忽相逼
但愁北地風沙多深紅轉淡香轉歇便恐飄隊隨流波
狂吹橫掃勢不定人意欲惜如花何我思此花昔誰植

看花幾輩頻經過前者難追後孰料花開歲歲殊委蛇
將花作主主爲客與客共醉金叵羅況值紅芳未衰改
春歸要仗詩留他軒窗雲母拓面面五色晃映看殊科
莫辭引滿對花醕花前認取朱顏酡

用訪滌生韻贈醕士

夢繞西湖千佛刹放船湖波艣聲戛覺來坐戀鄉味甘
酢魚羹美蒨絲滑此生合付白鷗閒遠俗從嘲黃鸝黠
不妨名字託漫浪何用文章苦茁軋鹿牀先生持玉尺
翠掃羅浮兩停輦家園水石足清峩春聽鳴鳩夏嘶蜚

鶴書促召出山來秀竹繁花鎮閒殺
謁還曳履上金鑾
四海共知霜鬢鬢一身幾負不堪七九事厭聞言律八
詩篇畫筆世爭求偉抱深情人不察仍多老淚哭稱稱
頻歲蘭芽遭剗別何日從公吟故山笑指浮圖下棲鶻

寄吳仲雲廉訪

吾州城東兩吳氏鬱鬱詩聲俱鵲起祭酒流風京兆丞
夔州替人繡衣使眼明寄讀花宜集笏菴清新不專美
星輶昔閱黔南山彩筆刻畫青巒岼牂柯江畔丹楓落
哥羅驛前黃日寒山祇愕舞要佳句訪俗重來冠康冠

廖冠峩峩官不賤朱墨紛紛料堆案此邦礪瘠萬山中
常調偏淹積薪歎訟庭草綠倒清樽梯田雨肥潤詩硯
公詩往往到古人判筆能爲萬室春手板朝來看山翠
黃紬夢裏覩吳莼百蠻風靜秋倉滿海國悲笳耳不聞

詩廊爲朗亭侍講賦

清都太微列仙儕入值金坡侍書惟有賜池館名澄懷
中羅水石清而魄喬陰一逕覆楸槐芰荷發水盈灣洄
退食岸巾時往來翛然紫府絕黃埃西家架格新亭臺
三山撥眼青崔崔昆明湖水平如栢迤東詰曲何遼哉

荒寒野色連硯涯紅蓼疏疏閒
芰觥醉夢忽墮江湖隈
東陽彩筆兼鄒枚玉柯散直銅龍回
曲廊尋詩誰所開
新安侍郎昔手恢憶跨詩壇推伯才
酒狂草聖鑒風雷
笑扳斗杓以手按龍門萬士爭摩挨
如鳥識鳳蟹朝魁
奧句奇章於此裁黃鐘甞從牛鐸諧
可憐今向蓬蒿埋
君繼邠居葺墜瓠枕溪卻月不足佳
朱蕙影落池心灌
雜花如錦酒如淮觥秋兀兀歡追陪
詩成何勞刻燭催

題吳仲雲先生輯詩圖

今古詩人一邱貉好音過耳良可哀
丈夫雄豪貴特起

往參大雅之羣材黑黃蒼赤有本質天妙欲自人閒來
誰云流風日綺麗柴桑一出元音回子昂太白未高蹈
刻鏤錦綵幾窮哉試將蘇陸雜兩宋屹如巨人俯童孩
砒然九奏洞庭樂世閒百蟄喧春雷吾浙朱查衍詩派
太鴻而下成陪臺爾來闕絕又幾時湖山氣象皆低摧
方伯勤勤搜國秀古賢早已歸鎔裁獨持北斗向斟酌
一空萬馬區龍駘不使清詞失傳諷更遣墜句揚幽霾
覽觀作者百年內風雨變滅須臾纔文章傳世豈足恃
喟然物外窮胚胎名成揚馬亦安用公作霖雨休徘徊

他日相逢一尊酒錦囊坐對西湖開

題林若衣浮水數鴻圖

木檣代舟浮水去江鄉漂流餘萬戶水深岸闊到蘆田
蘆中哀鴻不知數國家苞桑固元氣仁心要得良民吏
由來卓茂可公侯不重催科重撫字一簞捄死勝八珍
何勞白羽掃黃巾只今楚塞兵戈滿可惜流離畊鑿人
劉寬夫侍御藏沈啟南畫像絕類伯言戲簡

侍御傳觀石田象酷類先生貌清臞石田翁生宣德世
歷見七朝迄宏正是時明祚日方中年登人和無癘病

時平光岳倍鍾英治久百物能永命覃精績事老不厭
入十丹青筆猶勁前承清祕後停雲文采蘇臺遠輝映
圖書沾被僮奴慧亭館駢羅水竹淨於今青史位逸民
流傳鬚眉堪起敬先生行義我能道累葉高門襲華晟
起家科目解白衣郎署雖卑奉朝請棲遲京洛避黃塵
獨把殘書伴孤檠僻巷閒庭寂如水壞牆醜石殊非靚
但用文章自怡說緒續方姚昔未竟聲名雖闕有千秋
密友深譚推主盟蹤跡於翁兩不謀意獨老壽相頡頏
今過六十後方長生平亦際乾隆盛先生一笑予不知

吾與此翁真季孟人面相同心定異
椒曠各抱邱園性
翁蹈邱園我依隱何當歸休理吳榜
前身倘竟石田翁
三百年來換名姓會從侍御更乞取
掃壁高張愈窺鏡
十二月十九日劉寬夫侍御招集雪浪齋懸東坡

簪勝笠屐二妙寫真諸圖同諸君作

鬱鬱羣儒志三代有曉事者蘇公最
誰云洛蜀不相用
孔墨牽連赴時會裕陵初欲大任公
轉得臨川驟遷拜
天教姪直媚諸賢般爾旁觀百物瘵
才難可惜不同升
失此一機喟千載公文力匹韓歐陽
濟用才幾賈陸對

超然燕處觀物深解去苛矯責其大平生所持活國論
要測民依格天緯設令當路福斯人管子之功善因敗
自然除召當物情不似荆舒執孤隘此身忍使數顛踣
投老但窮詩世界未淹天上玉堂僊竭去東垣旂鼓帥
更經嶠外飽千罹空繼潮州毆百怪黃岡貶謫烏臺案
過眼蚊虻何足芥想見天懷曠浪人萬里黃河瀉襟帶
七百年來幾丙子降神此日迎神賽朋來欲羅四海英
公乎尙顧一杯醑雲幙圍春臘酒灩煙郊掃雪麥種壤
喧酣飲福醕千觴對案吾憂不能噉

贈伯言南歸

戰國之士羣好遊漆園僊吏傲獨不偶出貸粟監河侯
嗒焉隱几夫何求漢士執經意酋酋子長足跡半九州
海嶽寄觀萬里收歸來金匱羅千秋一隱一宦稍不侔
天遣二鳥鳴相酬我識先生文所繇氣則腐史神莊寥
非獨貌合彊鑄鏐高懷逸趣自可疇少日才名豈謬悠
京居廿載拙比鳩黃門懷槩聊淹留今竟翛然指故邱
青谿舊宅鄰潮溝敬亭山居擬探幽著書何必緣窮愁
千載相從頗綢繆論文如水以石投文章極境高岑樓

泊乎上與神者謀庖丁目眎無全牛掃落秕稃義寔浮
行矣衆盲失離婁敬爲先生舉餞甌願壽而康食忘憂
好學爲福耄敢偷卮言漫衍不自休成唐一經手刊脩
亦元亦史汎虛舟江水門前萬古流

效二十八舍歌

馬角烏頭事錯迂鰓入亢中不得吐大氏舉世崇突梯
君房寔能妙言語嗟嗟人心不可謂畏首畏尾甘咽茹
象箸未信啼箕子玉斗徒聞喚亞父懲往誰爲喘月牛
愁後曾無恤緯女虛如縣磬焉措久危如厝火安託處

憂來空慘長劍室挂壁龍吟欲蛟舞奎而藏之待時動
且自維婁莫飛去一朝鋒出鉞肝胃食昂長平土坑虜
摧枯拉朽迅已畢妖鳥遑能矜背距功成敝髮驀參墟
玉井蓮開飲秋滑故鄉仍聞狐鬼嘯適野何心花柳覩
斧柯坐歎鬢星星素琴高張不能撫會驂臨風應龍翼
愬帝一軫生人苦

題慈谿赤山族祖楨侍遊普陀圖

人生蹤跡若浮漚大海之大猶一漚漚中乃有落伽島
紫竹森森四時好五十三參事有無云是佛境非仙區

花爲優曇色鳥作迦陵聲天香夜不散法鼓晝長鳴中
有一巖更奇絕古佛精神昔憑厯但是有緣得見之寶
相莊嚴難具說吾宗孝與神明通飄然奉母乘長風乘
長風破巨浪家鄰瀛海狎濤淵揚舲歲歲常來往東西
厯盡巖中奇瀾蔬羞果親顏怡膜手靈巖求示現金輪
寶筏雙騰姿皺面恆河壽者相一朵慈雲長護持須臾
瞥覩佛光現蒼茫雲海蒸奇變爛若朝霞暈似虹林巒
五色增蔥蒨金橋突兀跨虛空彷彿珠眉紺髮容忽然
雲散光亦滅惟有朝曦蕩漾倒掛金芙蓉歸來寫此作

圖畫辭親忽稅長安駕金賤燕臺玉泣荆人事紛紛足
悲詫白雲望斷刻中天哀信還憑北雁傳悔逐浮雲離
膝下鯉魚風滯孝廉船回首靈峰闕幽異天邊一葦嗟
難至況復妖氛蔽海腥舟山戰血千燐紫蓮座驚看劫
火光鬢華莫厭兵戈氣彈指天人一刹那春暉苦短恨
如何披圖忍觸嬰兒慕想見終身廢蓼莪

赤山族祖辛丑被放南歸時已奉

母夫人之諱而歸舟尙未知也瀕行

命題侍遊普陀圖爰成長歌郵呈

訓正八月九日從孫懿辰書於海淀直廬

五言律詩

擬進

宣宗成皇帝挽詩四章

數倣堯年水頻瞻禹貌鰲憂民天有淚柔遠虜還啼遺
詔悲黃紙深宮想弋綈昆池連御宿目斷草萋萋

大度包無外卑梁隙早忘息人關欲閉屈已牘偏長捫
腕思頗牧秋毫思孔桑焦勞貽帝座十載話淒涼

玉几傳眞冷金甌付太平彌留仍被冕備豫早書楹水
鏡君心助郊宮禮意精非徒揚末命萬世慮先成

鳳紀周纔半龍輶去不回千官苴杖位萬國紙錢灰勝
水還悲慕空山自往來松風驅石馬泣對羨門開

寓齋

獨樹穿藤格深蕪翳竹根客來書滿坐雪後月當門市
近心偏遠樓高室易昏不須還潤色朴處似山村

徐氏女南歸

在目似不隔翻愁夢見空團樂此家裏索莫汝途中百
倚新傭僕偏寒欲雪風船窗俯霜水逐照北來鴻

偶憶五首

城橢如腰鼓江彎似折之人家抱山住小雨溼樓遲峰
斷市橋合竹開津步欹不論紅在樹綠暗也相宜

墓檜經雷劈祠蓮照水開容光能倒塔有鶴不孤梅隄
月穿橋過僧船挂席回香車迎畫舫門入湧金來

濤勢通

一作吞

胥母溪流近若耶春盤雪裏蕪雷鼓雨前

茶二月連三月桃花閒菜花半山山下水綠浸野人家
直上山顛路仍如市裏行樓臺重木末鐙火滿春聲金
地游人湊寶蓮泉水清感花何所感詩壁駁苔生

香市喧三月雲巖冷半房石泉分井味山閣得湖光古

寺傳鐘漫比鄰晒藥忙不知松鼠穴舍後樹多長

寄方植之先生

面見知何日心親亦有年淮南高隱地薊北早寒天忽枉書尺至如陪函丈筵說經老不厭述造富千篇

馬鄭原通學雷同乃俗流浮雲有時盡白日照千秋寄語幼誦子勿徒名象求殷勤掃榛蕪茲意豈悠悠

爲儒宿有名傲骨況嶢嶢卻說多衰病應難作遠行丹崖來馬嶮白髮禮熊生可使衡門下蘭枯桂獨榮

寄合肥徐懿甫

高人徐仲車質行向詩書豪傑交三楚文章辨一魚季
心知劇孟楊意荐相如早晚北隨計歌吟辭舊廬

至日入直

周正尊三統陽生又一年紅舒中禁日青裊大壇烟雞
樹含春意颺衣卸午天無風知有雪消息到梅邊

儀徵相公挽詞

臺鼎三師貴林泉一老留寒潮咽瓜步鬧市罷揚州寂
寞拏經室嵯峨文選樓遺書滿天下吟誦到千秋

浙水初開府潢池正弄兵英儒集東閣名將拔西平武

略孫盧瞽文風賈馬精鴻飛五十載無復昔諸生
身世浮雲幻勲名竹帛題微禽變淮海大鳥下關西入
相纔三殿明農遽一犁懸車多歲月心迹古賢齊
草澤羅佳士輶軒採國風文猶未復古公不久居中山
斗名原在權衡望已空普天寒峻淚滴與大江東

東滌生侍郎

官職春兼夏賢勞秋到冬宅門清似水轅馬瘦於峰治
事衙輒晨朝天街鼓鼙攜書就車看分俸與家供公隙
客仍滿帙多塵欲封辦官趨闕左校射入闈重卑食幾

無暇崇班定不逢山頭來熟面堆案貯盈甌紫陌詩懷
識清淤歸思濃未容狎鷗鳥會遣作夔龍

寄姚石甫先生三十韻

歸來兩鬢絲一劍撥年衰作客因交厚封侯信數奇東
槎泛龍伯西驛抵烏斯漲海昔多警樓船能出奇一丸
憑島嶼四戰固藩籬直擬茸茅賞翻遭薏苡疑孟舒就
鉗欽吳起泣漣淪已分窮邊棄仍邀特達知豐碑沈峴
首阜蓋下峨眉雲閣方虛伫轅門不詭隨心陵長史貴
論戒釋之卑虎落埋奴誓犍爲捧檄馳崎嶇荒徼外潦

倒暮年時五餌朝方用三明世不思幡然還白下渾欲
老鳩茲入幕才非屈迎門簪早持蘭陵三祭酒卽墨一
神師餘緒分籌筆旁觀看弈棋河漕調衆帥瘡札輯遺
黎要使扶元氣非專濟度支理財劉晏策論事馬周辭
上客談風月羣賢接履綦都官同乞罷故里適相期白
首成雙笑黃花對一卮新篇聞共和舊事邈猶追哀想
行林詠愴吟梁木詩山川攬龍虎翰墨引蛟螭海氣連
溟渤江流導蜀夔人生如夢耳憂患飽更之學道無一
事茫茫餘酒悲

戊申三月隨扈恭紀四十韻

上相司留鑰尙書運斗璇台星明玉鉉郎位拱珠躔

鑾輅時巡舉

橋陵聖孝虔果祠修漢代石馬緬唐

年隔歲仍親詣先期特

詔宣非徒懷雨露亦以勸桑

田沛澤寬租速勤民省稼先青郊愁坼塊白雨跂神淵

忽喜隨車降渾蘇宿種薦和豐從感召沴厲盡除蠲雲

淨諸峰涌星羅列幕圓離宮中建極異地各分廛屋乃

張帷作舟疑向陸牽引繩防越界曳旆儼戎旃巨麗摺

重廂尋常度兩筵喧喧成壘市浩浩轉人烟朝事旌門

肅官司櫛次編雁行分左右鳬藻入班聯黃齔辰初遞

丹毫文已傳無荒勤法

祖不息健符

天稍

綴樞曹末叨從橐筆偏來趨行在所不異省門前四照
荷囊結雙影綬帶懸急裝衣短後席地足卑跼渙汗綸

言出淋漓

詔墨鮮濡毫支曲几

賜食飫瓊饗輒許

天顏仰祇迎

法駕旋六飛頻策騎少海宛隨羈稱

妮期門隊徐驅蹕路平侍臣交罄折疆吏亦擎拳名馬
關西獻空羣冀北拳白輸歎玉矯青染離華妍桑野憐
縣宿蘆溝趁曉鞭嚴程班馬動載具橐駝便易水清流

繞房山翠色延園花留旖旎驛柳送連娟霽景時暘若
塵容一灑然餘春休沐罷還直 五雲邊

題七峰別墅十韻

別墅趨朝慣前湖潦水清西風萬荷歇夕翠數峰橫鏡
夾波爲界軒因樹得名樓高依北斗路轉豁南榮汲井
提攜便偏廬結構成族談頻退食孤枕易鄉情窗月鐙
星點庭霜葉雨聲百年茲倖直幾輩與升平閱世華顛
速澄懷道氣生蕭然山澤意立石剩崢嶸

蚶二十韻

一嚮遭多味南烹我亦甘孤虛憑棄擲血肉恣饒貪互
物人爭取羹材爾所堪專車形偶賦瓦屋號偏諳瀉鹵
初盈種溽塗憶半淹腥鹹過鯿市磊落滿魚籃小口移
船賣寒風壓背擔泥中憐渾沌潮退偶𪗇𪗇罅漏參差
泯文交左右函溝棱分細細宇雷覆潭潭薄味丹砂吐
濃漿赤石含金剛絨獷殼火齊入圓龕色紫添杯釀痕
醅帶臉酩白拋雙玳淨紅顫一珠酣翻手湯羹作垂涎
匕箸探還宜屑薑桂渾似擘橙柑海錯珍逾八侯鯖價
倍三新詩螺蛤嗜未議蟹螯參白下鄉思切尊前雋味

耽不須愁誤讀魁陸一名蚶

勃薺

珍蔬識鳧苳南來不脛馳白漿冰到齒赤削玉分肌昔
備荒年穀今同飮坐梨似聞糝養澤學種頗相宜

胡桃

桃有櫻胡別華林樹幾行纖絺蒙體固更革見風剛宛
轉成繆義連娟出洞房辛勤鑿空使攜種日西羌

七言律詩

仙跡

仙跡爪沙處處留
子公招入帝城遊
怪迂欲擬文成將
囊橐多緣武定侯
堪笑馬醫原淺術
居然牛腹有奸謀
漢庭刀筆何曾重
只畏鵬鷹在廩秋

草野

草野常懷夢日心
拂衣歸去轉沈吟
掃門魏勃來何事
伏闕哀章去莫尋
一角神羊原突兀
九關猛虎失陰森
他年青史論功狀
不信登天有翰音

次韻吳清如留別二首

不聽寒山寺裏鐘
陸沈金馬十年慵
曾吟蜀棧王貽上
還唱吳歛梁伯龍
七子詩才餘綺麗
一尊話別斲從容
紫微坐惜君房去
山色何如歸意濃

江南草色綠緜緜
白首來歸意恍然
載筆含香猶昨夢
看花縱酒憶當年
秋風嫋嫋思何極
暮雨瀟瀟曲可憐
曾是執珪吟未已
輸君先上五湖船

吳補之學士與清如同日乞假仍次前韻志別
不分清霜應九鐘
挂冠同日託衰慵
已聞溝唱東西水

莫化雲追上下龍季子由來能讓爵長公本自不求容
匡廬瀑布靈巖桂一樣秋光到眼濃

九疑幽恨遠聯綿大樹風飄亦偶然紫極況逢明日日
緋衫未到乞骸年思田賦就知難住相和歌成倍可憐
不使貪泉留夢寐一江明月兩歸船

次韻芝房見柬

年來騎省鬢雕疏寂寂閒花笑獨居春夢莊周迷蛺蝶
秋風張翰憶鱸魚烟波北渚愁懷裏塵土東華散直初
解向長安吟落葉聊衝赤尹緩歸驢

次韻芝房偕性農見訪

獵獵西風吹葛巾行吟誰識鳳池身
銍窗促坐成新詠月地聯遊得故人
斷酒年來呼惡客讀書夜分聒旁鄰
懷中磊落刊修筆不屑蟲魚注李巡

喜聞少鶴病已

君在窮途慶更生丈夫未死要崢嶸
膝攣市上還談相足斷車中尙用兵
況復走同黃犢健何須歸踐白鷗盟
便應西笑長安道春水江船盡室行

翰臣書來道粵西土賊甚劇

嶺外何時換祝良探丸赤白大披猖賊如原燎嗟難撲
官似池魚恐見殃決瘡潰癰如緩緩帶牛佩犢轉穰穰
安溪故事君宜勉一展龍弢掃陸梁

答董思陶

鬱抱閒愁不自寬獨攜詩卷別長安空陳曼倩三千牘
莫累宜僚十二丸白雪歌成聽愈寡黃金費盡說仍難
大江東出樅陽渡何處磯頭著釣竿

答戴存莊

君住桐鄉最北鄉偶來書劍謁天閭飄飄詞賦名原大

落落交游意轉長
暫逐狗屠飲燕市
終期龍臥起南陽
歌豐自得湖陰樂
我獨離憂仰屋梁

潘季玉養閒堂

人生識字始憂患
躑躅吞聲行路難
蝴蝶夢中聲栩栩
芙蓉鏡裏面團團
短長世或憐鳬脰
得失吾何戀鼠肝
忽解天弢游物表
兩閒何處不清安
螟蛉果羸亦能豪
莫向比鄰歎不遭
任遣瘦羊呼博士
久將肥馬謝兒曹
階前流水令心遠
戶外秋山與骨高
羸得養閒堂裏坐
笑看人海莽勞勞

孫琴西海客受經圖

天將六籍潤蠻荒
照海雲霞一葦杭
萬國冠裳陪胄子
三山職貢恪今王
同文象譯心能領
修摯珍貽手自將
傳讀君家赤城賦
迴看旭彩滿樽桑

和文信國公琴

萬里商聲白雁來
鳳山鐘虡變寒灰
朱厓惡浪君絃絕
碧血陰房正氣摧
市上龍章看昃日
海邊鼉憤蹴犇雷
當年一曲漸漸麥
蕉雨松風百倍哀

無題

客有自邯鄲來者錄示題壁三十首款署紫虛道人似效西崑詠史其詞恂恍而彬蔚有騷人之遺風究不知作者爲誰也

白玉堂前燕子驕桐華落盡鳳飛遙離心夏浦勞紆軫
捫腕燕臺歎寂寥愛國元成須斌媚忘家去病要嫵姚
倘聞風俗任公子莫遺前魚上早潮

不敕公車斷反支水晶簾顙映朱絲封章夜覽三千牘
諷諫朝披百一詩慎火漫矜新婦智揲荒未信越人奇
李雲紋訐朱雲鰲鄭國還應獻十思

紅綸碧檻帖瓊璫唐代華清漢建章綠耳御風天外路
黃頭捧日夢中郎山窗絲柳垂垂徧水殿么荷故故香
莫更思賢吟舊頓雞翹還許賦長楊

鳳吹悵悵碧澗流追涼好在殿西頭穠花合送今年喜
萱草能蠲宿昔憂誰獻偃師金傀儡虛傳車子鈿盤篴
銀河不動冰輪午向夕穿鍼何處樓

蟾池消息近如何誰把仙人玉斧柯聞說金花工抵觸
可憐騫樹尙婆娑門標鷗尾家聲遠班壓鰲頭御氣多
七國三邊憂未到惟將負羽答恩波

寶玦青珊四十年五陵佳氣欲衝天
自容枚叔居門下豈獨安仁拜馬前
緹騎應歸龍武將瓊枝冒執大誰鞭
若爲藏熱收聲去東第連雲好息肩

水精眠夢事依稀獨叩靈霄聖女扉
十二雲梯仙汲引半千寶蓋佛皈依
玉笈宛轉魚扃關綠字迷茫鳳紙飛
一霎神泉通滍溢下山都著鹿皮衣

三君八顧舊名高實望今來作禹咎
青翟功名無所見黃羊薦舉亦徒勞
爲犧本自嫌雞尾腐鼠何須赫鳳毛
畢竟老謀更事久推鋒不用用持牢

書帷曾共曉燈青桃李新陰滿鯉庭兩子夾河俱作守
三公避席爲傳經淹中自有疑丞禮天上無多輔弼星
一馬起家今萬石不應空守久芬銘

二百輕鸞逐旋添眉痕十樣碧螺纖詩工錦段龍梭密
字學銀鉤蠶尾尖秋雨秋風情脈脈長門長信夜厭厭
羊車若箇承恩待獨對珠絲網畫檐

紫陌流塵十二街倡優鉞劍兩俱乖李仙鶴慣參軍弄
張野狐工下里俳舞雪輕裾小垂手遏雲歌管太風懷
試從聒耳聲中想蜚雨蠻烟天一涯

黑山飛燕太恩恩
鬼馬長驅霧雨中
五管搶攘天眼醉
九州傳送地毛空
焚襦過計因仇蝨
坐甲經年欲化蟲
西水東流無定所
薤歌處處哭汪童

芙蓉幕府荔江開
楊柳旌旗桂海迴
袖裏龍弢迷五閭
鏡中燕頤損三台
宵孤臺省千官望
可待風雲百戰才
昨日彤墀頒斬馬
歐刀曾賜杜郵來

十二天閑慣吉行
愁聽雷電馬蹄聲
烽烟直照三湘水
樓櫓幾翻八桂城
射虎入山憐宿將
飛螭遍野苦鄉兵
何當一整金槍隊
笳鼓喧喧細柳營

落日邊聲大將饒野營部曲滿南郊
妄思困獸能投檻可縱飢鷹復出巢
遠處湖光浮綠草秋來瘴氣息黃茅
零陵石瀨春陵郭豈得軍鋒不一交

邊頭臥虎說潭潭坐鎮威名讐徼南
若使軍幡移白獸早期妖蠱掃金蠶
壺漿東道能無困巾幘西鄰合負慙
渴望居中銀手斷豈宜暮四復朝三

謾日欺天不可聞六張五角事紛紜
湯湯水齧淇園竹慘慘山圍芒碭雲
玉粒轉般無萬戶大魚跋扈有將軍
鼉靈鴈革何嘗化日日乘潮恨使君

朱旗高拂斗牛閒投袂長征棄甲還一自水仙邀撫賞
遂令山越扇凶頑豺牙虺毒歟徒盛鍊雨金風戰血斑
十丈節樓無恙在天弧從此不能彎

雙攜靈鵲住星津仙藥勤栽佛地春舶走萬方誇象主
樓高百尺壓鯁人青鳬飛去知無限烏鰂浮來亦有神
賴得數錢工姹女稍看牙眼鰐魚馴

紫塞寒門路幾重近關互市許甘松已判五指拘狂象
那覩三羅制毒龍銀鵲東馳欽察部銅頭西觸不周峰
七條信誓分明在試剔丹厓碧蘚封

渺渺風波泛木蘭中天華構託層壇摘殘瓜蒂神皋塢
網到魚針碧海乾續命青黏春作散補羸紅桂屑成丸
寄言揀玉量珠手好護靈根一寸丹

轉緣回黃尙可圖看朱成碧勿模糊漢家寶鏡名身毒
楚國雄鋒號湛盧猛虎威神喉下乙驪龍珍重睡時珠
從來金法傳風后莫漏吞舟問竊鈇

十駕何堪代渥洼雙南豈合伴泥沙歲寒廩廩青金樹
日及紛紛紅錦花阿閣幾時巢鸞鷖太虛從古蝕蝦蟆
紫氛蕩蕩靈氛杳手把瓊茅淚似麻

昨宵還是好家居風雨漂搖一敝廬支木維繩聊復爾
積薪厝火更何如誰憐玉貌魯連子不讀金穰越絕書
記得跋鳥初躍海紅雲盎盎日舒舒

兄事袁絲愧未能霜毛高刷九秋鷹敢呼豎子乘輿下
不畏驕王刺客興擘轡時時聞忼慨賜金往往得褻稱
憂時伸舉堪同調白筆風生紫石棱

青天滑澁似餽餽覆壓常虞蓋笠低殃及幾人餐水玉
淪胥何處拔丹梯犧尊未必勝溝斷庭樹安能傲井泥
可惜大槐宮裏客膠膠敢喚汝南雞

鬪罷麒麟未肯降
頻聞足鼓伐鼙鼙
海枯欲下金仙淚
天笑仍聞玉女窗
花底百勞渾結舌
竹中六逸但開缸
闌干雪涕雍門曲
同是朱絃別一腔

一聲鷓鴣妬芳魂
零淚西風建始門
滄海橫流憂晉室
簿書謹守誤金源
荀卿但欲歌成相
杜牧何嘗獻罪言
秋氣悲哉誰早覺
暗蛩吟怨到黃昏

遠道雙魚落一函
文無花發燕喃喃
江鄉秣米陶元亮
湖曲蒹葭賀少監
盡日車輪腸內轉
終宵石闕口中銜
思量去逐天隨子
坐看秋江卸暮帆

世外青山何處深山頭碧月有時沈
蚱蟬遂火須與景
鷗鳥隨波去住心肯爲黃圖捐一臂
請將赤子較千金
八龍婉婉雲旗邁
儵忽周流不可尋

五言絕句

香山五絕句

六年西園住始闕
西山路驅車指白雲
忽到雲生處
路出甕山背緣路
青松長溪旁多浣女
水流松花香
林開秋原曠時時
肄飲飛尙想先朝
事礪樓臺翠微
引泉過僧廚石龍
口吐水水流山去
活活聲在耳
樓觀隱昔昔霜林
一半紅離宮三十六
深鎖夕陽中

七言絕句

題汪楓人遺墨

當年玉樹並高名，各有清才噪鳳城。
一自西風吹斷雁，蕭蕭喬木動秋聲。

絳紗帷裏聞詩教，白玉樓邊索替人。
想得賢兄收錦字，金鰲聽雨獨傷神。

位西員外詩二十二篇道光己酉手書以貽方君勉甫者咸豐戊午余直書房居澂懷園勉甫以相示余爲題詩其後忽忽遂十年矣始道光廿一二年余初至京師位西與余舅氏項几山先生皆以博聞好古相愛故余知位西最早然方以從事科舉未敢親位西及道光之季余與王定甫戴存莊輩稍稍爲古文辭時一見位西然終不敢以所作眎位西而位西頗知余其賀余入翰林詩極良友鐫切之意蓋相愛甚至也位西初以中書直軍機處歷刑部員外郎深識偉論往往驚其儕輩會

朝廷出上相經略廣西位西決其十不可語尤駭人
大臣尤惡之會河工需人卽以位西名上位西得東河
位西母老遂奉以如工所已而粵賊渡河北犯遂言位
西守不力鐫二級罷去位西飄然歸矣咸豐己未余由
安慶引疾歸位西在杭州未能一相見明年杭州陷位
西遂及於難位西自重守古誼固宜與流俗不相中而
天之戾之顧亦如是哉今年春余重至京師見勉甫問
位西詩勉甫復出此冊余至不忍視雖然位西雖遭寇
亂死然竟能以名節自完可傳於後世而當時所謂大

臣擠位西以至於死者今亦安在哉嗚呼此不足爲位
西憾矣獨以余之無似承位西之相愛而無所樹立猶
多有愧於位西之言此可嘆也同治戊辰七月十八夜
半書於雙樹齋瑞安孫衣言

此冊凡詩三十有四篇位西自書以詒沈尙書者今亦
爲勉甫所藏位西旣沒賊中其生平所爲文字遺稿皆
不得出亂後其友今相國湘鄉曾公張君鼎高君均儒
蒐索萬方僅得十之一二今可見者禮經通論上卷古
文三十餘篇吳仲宣制府刻之淮安其讀書日記所謂

忱行錄者丁君丙刻之杭州而余所見尙書大意遂不可得詩則僅見此二冊及別紙草稿三十三篇頃聞朱修伯學士云亦嘗得其詩一冊有詩十餘篇又勉甫言其友人處亦尙有詩十餘篇大約百餘篇而已余於位西所著書最敬其說禮之精博而詩古文之雅潔超遠自梅先生伯言孫侍讀鼎臣外未見其比天旣不能使竟其學而其書又幾於無傳此可悲也古之文人如歐陽永叔王介甫皆極遭遇之盛韓退之柳子厚李習之歸熙甫之徒雖坎軻抑塞未盡其用而文字之可垂於

後者固具在也而位西所遇如此然則士之抱道績學
欲託文字以自存亦必視乎其世哉

別紙七言律三十首蓋位西感事之作其云紫虛道
人邯鄲題壁者寓言也又一紙七言古詩三首有伯
言先生湘鄉相國評隲語皆手書相國論詩之謹於
此可見而前輩友朋之相愛好主於直諒規切而不
苟於諛亦殊非後人所及矣余旣得位西遺詩欲爲
刻之而未暇一日語以潘侍郎伯寅慨然任之因各
書數語以歸勉甫俾爲別寫副本致之伯寅位西詩

或不至遂無傳矣同治戊辰七月十九日孫衣言識
余曩在都下與位西過從最密自咸豐二年出京位西
於五年訪余於南康軍中十年訪余於祁門軍中相處
旬日或月餘輒復別去厥後位西殉難杭州妻子轉徙
江海余聞而迎致之安慶患難相依越六七年每懷位
西容徽求其逸文遺墨邈不可得頃來輦下勉甫世兄
出示此冊感愴不能自已憶余與位西翦鐙談藝時杭
人如戴文節公及勉甫之尊人少穆侍御往往歡聚終
朝不忍別去今三君久歸道山余之衰老可知世事千

變又不足深論已同治己巳正月曾國藩識

道光辛丑春特試士之赴禮部者爲中書舍人邵員外
位西哀然首選旋直樞禁時海宇承平位西退食之暇
與唐鏡海梅伯言諸老宿以文章道義相往來一時推
博雅君子者必及位西咸豐紀元之初 詔求人才潘
文恭公以位西與林文忠姚石甫並薦嗣粵寇擾及東
南求才益亟其時位西已移疾家居胡文忠曾滌生相
國諸公復交章論薦有 旨召用矣位西因母老不出
已而杭城再陷遂及於難其平生著述悉歸炬燼滌生

相國於朋舊中最重位西求其遺墨甚切此二詩冊爲
勉甫世講所藏滌生旣索而題之今復示余勉甫尙有
位西自書題壁七律三十首並古詩三篇裝一長卷余
曾爲題卷簽卽孫琴西跋所云著錄別紙者以呈滌相
忽失去此可惜矣勉甫尊人少牧待御與余同通朝籍
先與位西同舉於鄉勉甫與其弟壽甫農部後先爲中
書舍人壽甫又將入樞直然則勉甫兄弟之與位西蓋
非獨鄉里年家之誼兼有同官前哲之思焉宜其珍護
遺編而不能已也爰書此歸之同治己巳五月順德羅

淳衍識

邵位西先生先君子同年友也先生官京師時與先君子講論經義恆至夜分學勤應試入都先生詢以所學爲之色喜出所著尙書大義見示且告之曰說書之家莫善於金仁山其精者見於通鑑外紀中時先生又補注史記輯綴於所閱本上下方幾徧其後先生回里復謁之於杭州庚申之變先生殉節遺書悉燼僅存者百無一二焉此冊乃先生在京日爲學勤錄所作雜體詩重是先友遺蹟藏之篋中嗣子子進司馬來京索觀欲

可以爲世守遂舉而歸之子進重付裝池囑誌其後學
勤思昔先君子譚經之友零落都盡而期之至深者莫
如先生忽忽二十年舊業日蕪無所成就有媿於先生
者甚多而孤露以來手澤雖存遺書未讀子進獨拳拳
於先世之遺文掇拾於殘亡之餘其賢弗可及也已同
治十年七月旣望仁和朱學勤謹識

位西丈與家君道光辛丑考試中書爲同年咸豐庚申
九月蔭考取國子監學正赴 圓明園引 見始謁丈
於七峰別墅是爲識丈之始遂偕游碧雲臥佛諸寺蔭

時受業於晉江陳先生之門嘗謂蔭曰子從頌南講漢學何不從遂生講宋學時閱學正試卷者湘鄉師也蓋丈之詆漢學特憤時事云爾非其本意也丈又向戴存莊諸君時時稱道蔭不置丈旋以先祖文恭公疏薦召對旣而讞某督獄又言時相不宜督師寢不爲當事所喜出視河鐫級歸庚申遂殉難同治辛未夏從方勉甫得其遺藁刊之感知已也葉潤臣丈言文案頭置簡明目錄一所見書手記於下方孫琴西丈云曾見之或者旦暮遇之當亦爲刊行也今修伯宗丞以是冊贈子進

世兄屬爲題之敬牽連書其後同治十年七月十七日

吳縣潘祖蔭敬識

按所見書目原本首尾完具敬藏待梓章謹附識

修伯內兄舊藏位西先生遺墨今先生子子進司馬入都丐爲世守修伯舉以歸之並與伯寅侍郎跋其後子進明日出都矣今晚奉是冊屬題經耳先生名久未獲一識面獲覩是冊乃如世尊在修行地中隨衆生意隨衆生界現種種身盡還得眼盲人歡喜也同治辛未七月錢塘孫詒經識於京寓之振敬草堂

先生歸里後

獻

介袁蓮伯以見勛之道義迺請執弟子

禮先生報書數百言援張彝歎之言以謝謂人之相與

期心神無異而已不在區區形迹閒也嗣是析疑請益

若折輩行與交咸豐丁巳獻從萬文敏師入都先生先

期馳書輦下諸老成皆以獻爲可以語上獻之奉手哲

人與聞緒論蓋先生假以羽毛也書問駢蕃慰誨非一

今在篋衍二通而已抗節家術終古結慕亂定見次君

子俊訪求遺書尙書大義刻成而燬禮經通論殘稿僅

存枕行錄及遺詩一卷先後行世承學之士亦可以私

淑艾矣而親炙如獻者溘落無成皮骨衰於犇走平生

引掖之言殆累先生以知人之誚文孫伯綱從學於獻
出示遺墨泣然雒誦猶憶先生書扇見貽詩篇多在冊
中尙有送龍布政至江西七言二首詩稿已佚此扇亦
亡謹憶保障東南曾侍郎卻待斧柯交手付二句埒書
於後以告伯綱學子譚獻拜識

位西先生名盛道咸聞於時瑩方學爲文聞而思慕無

緣請業比庚申難作闔門灰燼塊然獨活始橐筆走四
方而先生已抗節死矣厥後旅食京師每於友朋所得
見先生遺墨如勉甫同年所藏詩冊其一也夫以先生

之才若望旣登於朝有聲矣宜大有造於時迺性獨
抗直見悟權要朝升夕湛遽化猿鶴而去而平生箸述
又燬於兵火其廩乃得存者幾等吉光裘之一羽人乎
天乎伯綱茂才爲先生文孫與其弟仲威上舍並年少
有文行能世其業傳曰祖考之嘉名美譽子孫之冕服
膚宇也伯綱兄弟因而葺之不懈而張之其爲冕膚也
太矣是冊錄詩無多詩亦緒餘耳然無先生之學者必
不能爲先生之詩光緒丁酉六月伯綱來索題識屬
有他冗留庋兼旬敬書此歸之後學楊文瑩

謹按

先大父遺文盱眙吳勤惠公刻入望三

益齋叢書遺詩吳縣潘文勤公刻入滂喜齋叢書

海內學者未易覲輒復遺書屬鈔輾轉譌脫慮所

不免

章義

憾之婁欲以家藏兩叢書原本重行校

槧以饜學者之望奔走四方卒未有逮嘗從邊拙

存竺潭世丈

袖石太
世丈子

錄得遺詩十三首從譚復堂

師錄得譚子化書堂詩敘一首又訪得題、赤山

族祖侍遊普陀圖七古一首碧血錄後序一首其

佗名流跋語題辭亦閒有增益視望三益齋滂喜

齋所刻蓋稍稍廣矣惟杭州遘庚辛之厄先

大父旣以身殉楹書蕩然無復存者先考喪亂

餘生依曾文正遊安慶秣陵未幾歿於官

章義幼

孤賴慈訓圖自樹立飢驅垂二十年文章行誼

不能得先大父之萬一家學隊地用自憂悚

戊申春

章

客鄂謠知志局良手民尙有在者遂以

先大父詩文重加編訂仿望三益齋叢書本

付梓而以

先皇卹旨國史本傳及浙撫馬端愍奏稿曾文正撰

墓誌銘冠首俾世之君子讀

先大父之文閔

先大父之志而督責

章義

使克紹厥緒則庶

幾衰宗之微幸也夫

光緒三十有四年三月既望孫

章義

謹跋